



UNIVERSITÄTS-
BIBLIOTHEK
PADERBORN

Universitätsbibliothek Paderborn

Tyrocinium Theologicum

Francolini, Baldassare

Herbipoli, 1710

§. 1. Proponuntur chronologicè Fidei Controversiæ.

urn:nbn:de:hbz:466:1-39295

do igitur utilitati meæ tam amanter
consulis, hanc mihi tradere ne grave-
ris.

§. I.

*Proponuntur chronologicè Fidei
Controversia.*

Prima controversia fuit cum Poli-
theistis & Idololatris. Primus enim
error in materia Fidei fuit eorum, qui
plures admisere Deos, hinc dicti Po-
litheistæ ; qui & creaturis affinxeré
divinitatem, earumq; imagines & ido-
la cultu latriæ adoraverunt, hinc di-
cti idololatræ, quorum alii adoravérē
maximas arbores pro Diis, ut Indi :
alii Solem, ut Persæ : alii bestias terræ
ut Ægyptii, qui adoravérē crocodi-
los. Alii homines vel prudentiâ, vel
virtute militari, aut aliâ dote naturæ,
vel rebus utiliter gestis nobiles, ut
primùm Affyrii, & posteà Græci, Ro-
manique. Alii demùm dæmones ipsos
in statuis, aut ex adytis oracula red-
dentes, ut populi innumeri.

Se-

2. Secunda fuit cum Atheis, omnem Divinitatem negantibus, dicentibusque, mundum hunc universum ex atomis ab æterno & ex se existentibus, ac tandem casu in hunc rerum ordinem nexumque congregatis, extitisse. Hi fuere Thales Milesius, Anaximenes, Heraclitus & Empedocles Philosophi Græci.

3. Tertia fuit cum Deistis, seu Philosophis, qui omnem doctrinam à Deo revelatam rejecere, idque solum professi sunt, & profitendum docuerunt, quod lumen rationis dictat, nempe unum Deum existere, & inculpatè vivendum. De his videtur locutus D. Paulus, dum monet Colossenses cap. 2. v. 8. *Videte, ne quis vos decipiatur per philosophiam, & inanem fallaciam; hosque fugillat S. Augustinus tract. 45. in Jo. Eserunt quidam philosophi de virtutibus & vitiis sublimi tractantes, qui etiam dicere auderent hominibus: nos sequimini, sectam nostram tenete, si vultis beatè vivere; sed non intrabant per ostium.* Horum

rum secta dicta est etiam Philosophismus.

4. Quarta controversia fuit cum Sadducæis & Samaritis , quorum primi negabant resurrectionem mortuorum , ut ait Matthæus cap. 22. *In illo die accesserunt ad eum Sadducei , qui dicunt , non esse resurrectionem .* Samaritæ autem oriundi ex Ethnicis , quos Salmanasar abducens captivum Dei populum ex Palæstina , in hanc regionem transmiserat , sic Judaicam Religionem susceperant , ut superstitiona multa & gentilitia retinerent , habiti proinde tanquam hæretici à Judæis ; unde illud convitium in Christum : *Nonne bene dicimus , quia Samaritanus es tu ?* Joan: c. 8.

5. Quinta controversia fuit post Christi adventum cum Hebræis negantibus , jam advenisse Messiam , credentibusque , venturum tanquam Regem temporalem , qui alios Reges perdat , & Regnum Hebræorum temporeale restituat , augeatque.

6. Sex.

6. Sexta controversia fuit cum Phariseis ad fidem Christianam conversis, sed retinentibus, contendentibusque esse retinendam cum nova Christi lege, veteris observantiam, de quibus S. Luc. Act. cap. 15.

7. Septima controversia fuit cum Simonianis, seu Simoniacis, qui Simone Mago magistro, dicebant, Mundum non à Deo, sed ab Angelis fuisse conditum; non fore resurrectionem mortuorum; licitum esse promiscuum fœminarum usum; dona gratiæ venalia esse. Ex hoc Simone innumeri orti sunt errorum magistri, Cerinthus, Ebion, Menander & alii, qui circa an. 70. præter alios turpissimos errores docuerunt, Christum fuisse purum hominem, ac proinde negârunt, eum cum Verbo Divino unam eandemque personam esse; de quibus Jo: ep. 1. cap. 4. v. 3. *Et omnis Spiritus, qui solvit Iesum, ex Deo non est, & hic est Antichristus.*

8. Octava controversia fuit cum Nicolaitis, qui dicebant, licere fornicationem, & vesci Idololytis. Incertum est, an eorum auctor fuerit Nicolaus unus ex septem Diaconis, de quibus mentio fit Act. cap. 6.

9. Nona controversia fuit cum Saturnianis, & Basilidianis, quorum primi auctore Saturnino Menandri discipulo circa annum 118. docuerunt, Christum apparenter, & in specie tantum apparuisse; Basilidiani verò authore Basilide & ipso Menandri discipulo circa an. 124. non solum carnis resurrectionem negarunt, sed virginitati nuptias æquiperarunt; multa circa Incarnationem, Trinitatem, & Mundi creationem delirabant, & persecutionis tempore Christum citra culpam negari posse dicebant.

10. Decima controversia fuit cum Millenariis, sive Chiliaстis, qui auctore quidem Cerintho, sed aliis postea sectæ propagatoribus, circa an.

130. docuerunt post resurrectionem Christum per mille annos regnaturum in terris cum Sanctis in deliciis, & voluptatibus corporis.

11. Undecima controversia fuit an. circiter 150. cum Cerdonianis, Secundianis, Marcionitis, Valentianis, & Gnosticis demum omnibus, qui præter turpissima, quæ tanquam licita permittebant, videntur in eo convenisse, quod duo essent rerum principia, unum bonum, alterum malum, & quod Christus Dominus non verè habuerit carnem humanam, sed vel solum apparentem, vel carnem quandam Cœlestem, & impassibilem.

12. Duodecima controversia fuit cum Quartodecimanis, dicentibus, Pascha celebrandum esse 14. Luna, quocunq; hæc occurrisset hebdomadæ die. Hi erant Episcopi Orientales. Contentio autem ortum habuit sub Aniceto, aucta est sub Eleutherio, viguitque usque ad Victorem, qui circa

circa an. 198. instituit, ut Pascha celebaretur, non decimâ quartâ Lunâ more Judæorum, sed die Dominico decimam quartam Lunam, & Äquinoctium vernale immediate sequente, prout ab Apostolis traditum erat, & observabat Ecclesia Romana. Nec acquiescentibus adhuc multis Orientalibus Episcopis, fuit hoc ipsum in Nicæno I. sancitum, & in aliis postea Conciliis confirmatum.

13. Decima tertia Controversia fuit circa an. 173. cum Tatiano, ejusque discipulis, qui docebant 1. Matrimonium malum esse, hinc Encratitæ appellati, id est continentes. 2. carnes quoque malas esse, & à malo principio, id est, à Dæmone creatas; similiter vinum, ac proinde ab utroq; abstinentem, quod ipsum docuit eodem tempore Severus, unde Severiani: Adamitæ quoque circa an. 194. auctore quodam Adamo, nudi incedentes nuptias exhorruere, sed interim

rim promiscuos concubitus permittebant. Horum sectam s^eculo 15. quidam Picardus renovare tentavit.

14. Decima quarta Controversia fuit cum Montanistis ex Montano Phrygio (unde dicti Phrygii, Phryges , & Cataphryges , id est, juxta Phryges) qui circa an. 181. cœpit docere, sibi, non Apostolis infusam esse cum Spiritu Sancto gratiarum plenitudinem , secundas nuptias malas esse. Matrimonium posse dissolvi , lapsos post Baptismum salutem consequi non posse saltem per Ministros Ecclesiæ , &c. nova jejunia prædicabat tanquam necessaria , &c.

15. Decima quinta controversia fuit cum rebaptizantibus , nempe docentibus Baptismum collatum ab Hæreticis non valere , ac proinde ab his baptizatos esse rebaptizandos. Horum auctor fuit circa an. 250. Agrippinus Carthag. Ep. cui & Cyprianus successor adhæsit , antequam tandem hic error in hæresim abiret.

16. De-

16. Decima sexta controversia fuit per eadem tempora , aut etiam antea cum aliquibus Episcopis rigidoribus , de quibus agit S. Cypr. ep. 54. ad Cornelium Papam , & epist. 52. ad Antonianum , qui aliquibus in majora quædam crimina prolapsis , & præsertim Apostatis , Mechis , & Homicidis veniam etiam in morte negandam contendebant.

17. Decima septima controversia fuit cum Novatianis qui circa an. 255. prædictum rigorem in omnia criminâ extenderunt , addiderûntque , non esse in Ecclesia potestatem remittendi peccata post Baptismum commissa , neque deberi baptizatos sacro chrismate confirmari , secundas nuptias vitandas ut illicitas. Hujus hæresis auctor fuit Novatianus Presbyter , & Pseudopontifex Romanus , impulsu Novati Presbyteri Carthaginensis.

18. Decima octava controversia fuit cum Sabellianis , qui auctore Sa-

Sabellico circa ann. 260. docuerunt, Patrem, Filium, & Spiritum Sanctum esse unam personam cum tribus hisce nominibus.

19. Decimanona controversia fuit circa an. 273. cum Manichæis, qui hæresim Cerdonianorum, Marcionitarum, Carpocratianorum, Gnostcorum, aliorumque prædictorum expressiūs docuerunt circa duo rerum principia coæterna, unum bonum, alterum malum, addiderūntque, nihil esse verè spirituale, sed omnia esse corporalia; hominem non esse liberi arbitrii, & omnium peccatorum causam esse naturam mali principii; vetus Testamentum fuisse à malo principio, ideoque rejicendum; ab eodem esse carnem & vinum; ac proinde ab utroque abstinentium; animas migrare de corpore in corpus &c. Hujus sectæ auctor fuit Manes, sive Manichæus, qui se esse Spiritum Sanctum Paraclitum à Christo promissum dicebat.

20. Vi-

20. Vigesima controversia fuit circa annum 310. cum Donatistis, qui Magistro Donato in Numidia Episcopo docuerunt in Ecclesia esse solos bonos, imò eos solos, qui essent à parte Donati, & rursùs, Sacra menta à malis Ministris collata nulla esse.

21. Vigesima prima controversia fuit circa annum 320. cum Arrianis, quorum auctor Arrius Presbyter Alexandrinus dicebat; Verbum, Dei Filium, esse creaturam, non esse coæternum, nec consubstantialem Patri, & in Christo locò animæ fuisse ipsum Dei Verbum. Ex his orti fuere circa annum 359. Semiarrianiani, qui ajebant cum Arrianis, Filium non esse Patri consubstantialem, non tamen per omnia dissimilem. Arrianismum renovârunt saeculo decimo sexto Joannes Campanus, Michaël Servetus Hispanus, Valentinus Gentilis Neapolitanus, Paulus Alciatus Mediolanensis, & præsertim duo Socini Lælius, & Faustus nepos Senensis, qui hunc errorem per

Po-

Poloniām præsertim , & Transylvā-
niam disseminārunt.

22. Vigesima secunda controversia
fuit circa annum 340. cum Ærio , Æ-
rianisque , qui erroribus Arrii duos
alios addidere , dicentes , inutile esse ,
orare , & Sacrificium pro defunctis of-
ferre , & Episcopis æquales esse Presby-
teros . Aliqui hunc Ærium vocant
Ætium.

23. Vigesima tertia controversia
fuit circa idem tempus cum Photino
Sirmiensi Episcopo , qui renovans er-
rorem Cerinthi & Ebionis , docuit ,
Christum non esse Deum , sed purum
hominem , addiditque cum Sabellio ,
Deum non esse trinum .

24. Vigesima quarta controversia
fuit cum Macedonio Episcopo Con-
stantinopolitano , qui anno circiter
359. docuit , Filium quidem esse Patri
per omnia similem , sed Spiritum San-
ctum esse creaturam .

25. Vigesima quinta controversia
fuit anno circiter 367. cum Appollī-
mario ,

nario Episcopo Laodicæno , qui hæ-
resim Arrii , & Macedonii simul con-
jungens docuit , Verbum Divinum
accepisse carnem humanam sine ani-
ma rationali , vel sine mente , ut esset
ipsum loco mentis , & Divinas Perso-
nas esse inæquales , magnum videli-
cet esse Spiritum Sanctum , majorem
Filiū , maximum Patrem .

26. Vigesima sexta controversia
fuit cum Vigilantio natione Gallo , &
Barcinonensis Ecclesiæ Presbytero , qui
anno circiter 400. docuit Sanctos non
esse invocandos , nec honorandas eo-
rum reliquias , quod anteà docuerant
Eunomiani , Eustathiani , & Porphy-
riani , & postea docuerunt Valdenses ,
Wicleffitæ , Hussitæ , Lutherani ,
Zwingliani , Calvinistæ , nostrique
temporis hæretici ferè omnes .

27. Vigesima septima controversia
fuit circa annum 425. cum Pelagio
Monacho Britanno , docente pecca-
tum originale non esse in hominibus ,
& sine gratia Dei posse impleri om-
nia

nia mandata. Hujus erroris propugnatores acerrimi fuere Cœlestinus itidem Monachus, & Julianus Capuæ Episcopus; impugnator verò maximus S. Augustinus, ex cuius libris male intellectis prodiere alii errores, & priuò Adrumetinorum quorundam in Africa Monachorum, qui ita gratiæ Dei necessitatem prædicare cæperunt, ut dicerent hominem liberum non esse, nec corrigendum in malefactis; sed hi brevi ipsius D. Augustini operâ errorem suum deposuere. Secundo Semipelagianorum, seu Massiliensium (fuerunt enim Massiliensis Ecclesiæ Præsbyteri) qui lecto libro D. Aug. de correct., & grat. ad Adrumetinos Monachos scripto medium quamdam viam ineundam putârunt, docentes cum Pelagianis, initium salutis nostræ, à solis Naturæ viribus penderre, cum Catholicis verò reliquum salutis, non à sola natura, sed à gratia pendere. Hos secuti videntur Casianus Monachus, cæteroqui vitæ probatifs-

batissimæ , Faustus Lirinensis cænobii Monachus , inde Abbas , & postea Regiensis Episcopus , Vincentius Lirinensis , Gennadius Massiliensis Ecclesiæ Presbyter ; & Tertio Prædestinatiorum , qui circa eadem tempora malè intelligentes libros S. Aug. de grat. & prædestinat cæperunt docere bona operanihil prodeesse reprobis, nec mala nocere prædestinatis : ac proinde neutros sollicitos esse debere , vel ut bene agant , vel ne malè agant ; quam hæresim sæculo nono renovavit Gottschalchus natione Germanus , professione Monachus , & sæculo decimo sexto Lutherus & Calvinus.

28. Vigesima octava controversia fuit cum Nestorio Episcopo Constantinopolitano , qui anno 430. cœpit docere , B. Virginem non esse Dei Matrem , & in Christo duas esse personas , alteram Divinam , alteram humanam.

29. Vigesima nona controversia fuit paulò post cum Eutiche Abbe,
& Dio-

& Diostoro , qui , ut Nestorio contradicerent , docuerunt , in Christo non solum unam esse personam , sed unam naturam . Hæ duæ hæretæ , nempe Nestoriana & Eutychiana , hucusque durant in partibus Orientis , ut dicit Bellarminus in sua Chronologia . Eutychianæ hæresis magnus per Africam propagator fuit sexto currente sæculo quidam Jacob homo Syrus , unde Jacobitæ . Cophti etiam in Africa , ubi suum Patriarcham habent , ac tenere dicuntur celebre monasteria , in quo fuit domus olim habitata à Christo púero in Ægyptum profugo . Eutychiani fuerunt , & fortè sunt etiam modò Eutychi studuisse dicuntur Acæmetæ in Scythia & Constantinopoli Monachi , dicti etiam Studitæ , & Petrus Gnaphæus dictus Fullo , Pseudo-Episcopus Antiochenus , docens circa annum 476. Deum ipsum passum esse , & crucifixum , hoc est , ipsam Deitatem , imo Trinitatem , ut videntur significâsse . Hujus Petri di-

H scipuli

scipuli dicti fuerunt Theopatitæ, seu Theopassitæ.

30. Trigesima controversia fuit cum Monothelitis, qui ducibus Sergio Constantinopolitano Patriarcha, Cyro Episcopo Alexandrino, & Macario Antiocheno, circa annum 630. docuerunt, in Christo Domino unam duntaxat voluntatem esse.

31. Trigesima prima controversia fuit cum Mahometanis. Horum dux Mahometes, natione Arabs, professione mercator vilissimus, inde ductor exercitus, circa annum 630. ex pluribus sectis suam confecit & propagavit; cum Sabellio siquidem negat in Divinis Trinitatem Personarum, cum Carpocrate, aliisque Christum negat Deum esse, et si Prophetam sanctum esse affirmet; cum Audeanis, Deum corporeum esse fingit; cum Judaeis & Ebionitis circumcisionem ut necessariam recipit; cum Epicuro supremam felicitatem, seu supremum bonum in

cor-

corporis voluptate ponit, cum Tatianis vini usum suis prohibet, &c.

32. Trigesima secunda controversia fuit circa annum 719. cum Iconomachis, nempe sacrarum imaginum impugnatoribus. Horum primi fuerunt Judæi, mox Mahometani, sed qui eis crudelissimum hoc tempore bellum indixit, fuit Leo III. Imperator, vulgo Isaurus.

33. Trigesima tertia controversia fuit anno circiter 796. cum Albanensibus, qui renovârunt errorres Manichæorum de dupli principio, & de transmigratione animarum; Et rursus: Sacmenta, resurrectionem corporum, extremum judicium, infernum, purgatorium, & Ecclesiæ potestate negârunt, ipsumque Christum aut non verum hominem, aut impassibilem fuisse dixerunt.

34. Trigesima quarta controversia fuit cum Græcis circa annum 1050. Cœperunt quidem Græci tempore Nicolai I. auctore Photio schisma fa-

cere : tamen hoc tempore apertissimè se ab Ecclesia Romana diviserunt , & cœperunt defendere errores suos, némpe hos , Spiritum Sanctum à Patre & Filio non procedere , sed à solo Patre ; Eucharistiam non in pane azymo , sed in solo fermentato confici posse ; purgatorium nullum esse , nec justis ante diem judicij æternam felicitatem conferri , nec damnatis æternum supplicium ante dictam diem infligi ; Romanum Pontificem non esse totius Ecclesiæ Caput & Primate. Notat Hosius lib. de Sacerdot. coniugio , quaterdecies esse Græcos sponte ab Ecclesia Latina scisso , & ad eandem toties ferè reversos.

35. Trigesima quinta controversia fuit pariter circa annum 1050. cum Berengario , Archidiacono Andegavensi , qui docuit ; in Eucharistia non esse verum Christi Corpus & Sanguinem ; deinde revocans hunc errorem, docuit , cum Corpore Christi esse etiam substantiam panis : addidit , parvulos

vulos non esse baptizandos, sed tan-tum adultos.

36. Trigesima sexta controversia fuit anno circiter 1120. cum Petro de Bruis, natione Gallo, & Henrico Tolosano Monacho Apostata, qui docuerunt Missæ Sacrificium nihil esse, fidelium preces nihil defunctis prodesse, Baptismum sine Fide nihil conferre parvulis.

37. Trigesima septima controversia fuit circa annum 1140. cum Petro Abailardo, qui doctrinam defendebat mixtam ex Arrianismo, Nestorianismo, & Pelagianismo, nihilque esse credendum dicebat, nisi quod intellectus noster beneficio rationis comprehendere posset. Huic adhæsit Arnoldus Brixensis; Romæ tandem strangulatus.

38. Trigesima octava controversia fuit circa annum 1160. cum Pauperibus de Lugduno, dictis Waldensibus, ex Waldo quodam Lugdunensi, qui ex mercatore opulento factus voluntarius

tarius pauper, cœpit prædicare, & ex ignorantia errores docere, reprehensus à Clero errores auxit. Hi fuere præcipui: primò Ecclesiæ Christi ministros propria possidentes, peccare omnes contra præceptum Christi: *nolite possidere aurum*, ac proinde Romanam Ecclesiam defecisse à tempore Sylvestri I. quo possessiones habere cœpit, nullum in ea, quantumvis probum salvari posse; spernendas esse ejus indulgentias, benedictiones, consecrations cæremoniæ; nec obedendum esse Ecclesiæ Prælatis. Secundò, omnem potestatem, etiam laicam, solo peccato mortali deperdi, peccato autem carentem evadere sacram: ac proinde Sacerdotem in peccato mortali existentem, nec consecrare, nec absolvere, laicum econtra justum hæc omnia ritè facere. Tertiò, nullam orationem præter Dominicam esse faciendam.

39. Trigesima nona controversia fuit circa annum 1200. cum Albigensibus

sibus hæreticis pessimis, & ejusdem fere doctrinæ cum Albanensibus, de quibus suprà egimus controversiâ 33. & nisi armis subacti fuissent, totam Europam corrupissent.

40. Quadragesima controversia fuit circa annum 1250. cum quodam Guillelmo de S. Amore Doctore Parisiensi, qui ex odio in Ordines Mendicantes docebat, non licere omnia sponte relinquere, & ingredi Ordinem Religiosum, qui non habeat saltem possessiones in communi. Hujus libros Alexander IV. Papa damnavit.

41. Quadragesima prima controversia fuit cum Flagellantibus, qui circa annum 1273. per Italiam, Galliam, Germaniamque vagantes, & se flagellis ad ostentationem cædentes, docebant, ab adventu suæ sectæ Christi Evangelium cessasse, & baptismum aquæ in baptismum sanguinis, quem quisque flagellis è suo corpore deberet elicere, esse mutatum: Flagella-

tionem tandem martyrio æquiparan-
dam , aut etiam præferendam.

42. Quadragesima secunda contro-
versia fuit cum Fraticellis , quorum
errores similes fuere erroribus Pau-
perum de Lugduno. Hos damnavit
Bonifacius VIII.

43. Quadragesima tertia contro-
versia fuit circa annum 1300. cum Be-
guardis & Beguinis, seu Bisochis , quo-
rum præcipui errores fuere : Homi-
nem in hac vita posse evadere sic per-
fectum, ut reddatur impeccabilis , &
amplius in gratia proficere non ya-
leat : hominem verò , qui talem gra-
dum sit assecutus , non teneri amplius
orare , nec Ecclesiastica jejunia serva-
re , nec ullos virtutum actus exerce-
re , nec nulla bona opera præstare ; imò
nec assurgere , dum elevatur Venera-
bile Sacramentum. Rursus, hunc ho-
minem in hac vita posse assequi bea-
titudinem ita perfectam , ac in Patria.
Idem tamen cum tota suatam sublimi
perfectione actum carnalem ob-
gran-

grantem concupiscentiam excusabant. Dainnati fuere in Concilio Oecumenico Viennensi, sub Clemente V. anno 1311.

44. His non absimiles fuerunt Illuminati, orti in Hispania anno circiter 1575. & iterum postea anno 1623. quorum capitalis error erat, quod tantam cum Deo unionem, talēmque perfectionis statum vi orationis mentalis se assecutos jactarent, ut nec bonis operibus, nec Sacramentis amplius egere se dicerent, & posse sine culpa turpissima quæque patrare.

45. Quadragesima quarta controversia fuit circa annum 1340. cum Joanne Wicleffo, qui Vigorniensi Episcopatu non impetrato, à Romano Pontifice defecit, & errores Waldensium circa Ecclesiæ potestatem, & Ministros, ipsosque laicos Magistratus controversiâ 38. recensitos renovavit. Addidit substantiam panis & vini remanere post consecrationem, Christum in hoc Sacramento non esse

H 5

rea-

realiter , & in propria corporali præsentia , omniāque absolutā necessitate evenire. Hos aliósque ejus errores damnavit Concilium Constantiense generale.

46. Quadragesima quinta controversia fuit cum Joanne Huss (unde Hussitæ) & Hieronymo Pragensi , insigni Boëmorum Doctore , qui anno circiter 1407. Waldensium & Wiclefitarum errores renovavit. Addidit , omnes etiam laicos debere sub utraque specie communicare. Uterque fuit in prædicto Concilio Constantiensi combustus , anno 1415.

47. Quadragesima sexta controversia fuit cum Petro de Osma , Professore Theologiæ in Academia Salmanticensi , qui docuit , Confessionem merum institutum humanum esse ; & rursus , pœnitentes absolvi non debe re ante peractam pœnitentiam. Damnatus fuit à Sixto IV.

48. Quadragesima septima controversia cœpit circa annum 1517. cum Luthe-

Lutherò Saxone Apostata, cuius præcipui errores fuere: liberum hominis arbitrium per Adæ peccatum extinctum fuisse; nullum esse hominis meritum ad salutem; hominem *sola* fide, sine operibus justificari; Sacra menta novæ Legis nec gratiam conferre, nec characterem imprimere, Confessionem auricularem esse humanum inventum; in Eucharistia cum Christi Corpore manere panem; nec Christi Corpus in hoc Sacramento esse semper, sed in solo usu; ab omnibus sub utrâque specie sumendum hoc Sacramentum; Missam nec à Christo institutam, nec Sacrificium esse; Sacerdotes ad cœlibatum non teneri; Indulgentias nullas esse; Sanctos nec colendos, nec invocandos; Contritionem ex solo metu conceptam peccatum hypocrisis continere; In Ecclesia solos esse bonos; purgatorium ex Scriptura probari non posse. Hos errores damnavit Leo X. ac postea Concilium Tridentinum.

49. Ex Lutheranis orti sunt semi-Lutherani, qui erroribus Lutheri alios errores addidere, non tamen Lutherio contrarios; & Antilutherani, qui addidere contrarios, ut Anabaptistæ, (quorum caput & magister Nicolaus Storkius, vel Balthasar Pacimontanus docuit, Baptismum parvulis nihil prodesse, eosque rebaptizandos, cum fiunt adulti) & Sacramentarii, qui Christi Corpus in Eucharistia esse negant, quoruin signiferi Carolstadius, & Zwinglius fuere.

50. Confessionistæ verò & Protestantæ Lutherani dicuntur, qui Confessionem Augustanam, quam Philippus Melanchton composuit, sectari se jactant & protestantur, h̄iq; dividuntur in Rigos, qui solis adhærent Lutheri placitis; Molles, qui Wittenbergensem Confessionem profitentur, & Extravagantes, qui subscriptisere quidem Confessioni Augustanæ, ut Principibus placerent; sed interim se-stantur dogmata Luthero contraria.

51. Quadragesima octava contro-
versia fuit cum Calvinio, qui circa an-
num 1557. prædictis Lutheri errori-
bus hos alios addidit: Decreta Dei non
esse ab æterno ; Christum non esse
mortuum pro omnibus, sed pro solis
prædestinatis; per suam passionem ni-
hil sibi meruisse; illum in cruce despe-
râsse, nec verè ac propriè descendisse
ad inferos; ab initio multa ignorâsse,
quæ postea didicit ; DEUM præde-
stinâsse, alios quidem ad gloriam , &
alios ad supplicium, sine ullo illorum
merito , & horum demerito : hoc
decretum tollere humanis actibus li-
bertatem ; non dari gratiam habi-
tualem, sed solam actualem , eamque
talem, ut non sufficiat ad servandam
totam legem ; Deum esse auctorem
peccati, & ab eo homines ad peccata
impelli; filios Fidelium nasci sanctos,
nec Baptismo indigere , infidelium
filiis Baptismum non prodesset; filios
illegitimos ad Baptismum non ad-
mittendos ; in Sacramento Euchari-

sticæ esse solum figurativè Christi Corpus & Sanguinem. Hos errores damnavit Concilium Tridentinum. Ut autem Lutherus Germaniam, ita Calvinus infecit Gallias, ubi Calvini-
stæ dicti sunt Hugonotti.

52. Angliam verò, postquam Henricus VIII. an. 1535. Romani Pontificis obedientiam excussum, & se caput Ecclesiæ Anglicanæ constituit, Lutheranismus, & Calvinismus invasit, errorésque alii; hinc multiplex in ea secta. Præcipuae sunt Protestantum, & Puritanorum, qui Presbyteriani dicuntur, & Independentium. Protestantes autem in Anglia multùm differunt à Germanicis, & aliquibus Lutheri, aliquibus Calvini, aliisque erroribus adhærent. Ac 1. statuunt, Regem esse caput supremum Ecclesiæ Anglicanæ. 2. Admittunt Ecclesiam debere constare ex Archiepiscopis, Episcopis, Decanis, aliisque gradibus Ecclesiasticæ Hierarchiæ. 3. Varios recipiunt Catholico-

rum

rum antiquos ritus, altaria, cereos, superpellicea; non tamen Christi præsentiam in cæna Eucharistica admittunt. Hanc sectam profitetur Rex, & Aula.

53. Puritani econtra sunt rigidi Calvinistæ, & Protestantibus è diametro opponuntur. Et 1. Purum Dei Verbum juxta Calvini placita se admittere profitentur. 2. Negant Regis in Ecclesia primatum. 3. Eliminant omnes Ecclesiæ Romanæ ritus. 4. Excludunt gradus Ecclesiasticæ Hierarchiæ, voluntque Ecclesiam suam, Exclusis Episcopis, ac ministris, à solis senioribus Laicis administrari, inde dicti Presbyteriani.

54. Independentes, qui maximè Cromuelli tempore emerserunt, in hoc Puritanis, ac Protestantibus adversantur, quòd neque Reges, neque Episcopos, neque Seniores ad Ecclesiæ regimen admittant, sed velint quemlibet sibi Ministrum esse, ac sine ulla personæ, ac sexūs distinctione esse

esse legitimum verbi Dei præconem , idque quovis loco , ac tempore , dum sentit se à Spiritu Sancto ad prædicandum Dei verbum impelli ; ac proinde templa , altaria , pulpita è medio tollunt . Dicunt autem contra prædictas duas sectas , quod sicuti illis licuit , antiquos Romanæ Ecclesiæ ritus everttere , aut reformare , ita , imò multò magis ipsis licet ritus ab his de novo inductos rejicere .

55. Post prædictas tres sectas , quæ in alias dividuntur , orta est in Anglia non ita pridem nempe ann. 1655. secta nova , Tremblantium , seu Tremolantium dicta , qui cæperunt Londini , quasi cœstro quodam perciti in compitis , ac triviis comparere solo inducio tecti . Hi miras visiones , revelationesque jaētantes veluti concionabundi cæperunt mone re populum , oportere in timore , & tremore salutem operari . Horum aliqui fuere comprehensi , & flagellis cæsi ; & præsertim ipsorum dux

Jaco-

Jacobus Noilor, qui quamvis publicè stigmate iniustus fuerit, nihil tamen de sua insania remisit. Durat autem etiam nunc hæc secta Fanaticorum in Anglia, docetque inter alia 1. Scripturas non esse Dei verbum, nec in eis contineri veram, & salutarem doctrinam. 2. omnes homines habere ex se lumen sufficiens ad salutem. 3. homines non justificari per Fidem in Christum, sed per opera. 4. Pro hominum corporibus post mortem neque constitutum esse Cœlum, neque Infernum, in quo immortaliter vivant, adeoque non futuram resurrectionem corporum.

56. Quadragesima nona Controversia fuit cum Michaële Bajo Doctore Lovaniensi, cuius multi fuerunt errores contenti in septuaginta novem propositionibus à B. Pio. & Gregorio XIII. ac tandem ab Urbano VIII. damnatis, quorum Pontificum Constitutiones consulere potes.

Disc.

Disc. Id etiam laboris ut subeas; rogo, & prædictas propositiones, quas ex Calvinismo ortas audio, ac tandem in Jansenismum abiisse, de quo tam frequens modo sermo est, recitare ne graveris.

Mag. Quoniam id à me postulas, recitabo. Sunt autem, quæ sequuntur:

1. Nec Angeli, nec primi hominis adhuc integri merita rectè vocantur gratia,

2. Sicut opus malum ex natura sua est mortis æternæ meritorium, sic bonum opus ex natura sua est vitæ æternæ meritorium,

3. Et bonis Angelis, & primo homini, si in statu illo perseverasset usque ad ultimum vitæ, felicitas esset merces, & non gratia,

4. Vita æterna homini integro, & Angelo promissa fuit intuitu bonorum operum, & bona opera ex lege naturæ ad illam consequendam per se sufficiunt.

5. Ia

5. In promissione facta Angelo, & primo homini, continetur naturalis justitiae constitutio, quâ pro bonis operibus sine alio respectu vita æterna justis promittitur.

6. Naturali lege constitutum fuit homini, ut, si in obedientia perseveraret, ad eam vitam pertransiret, in qua mori non posset.

7. Primi hominis integri merita fuerunt primæ creationis munera, sed juxta modum loquendi Scripturæ sacræ, non rectè vocantur gratia; quo sit, ut tantum merita, non etiam gratia debeant nuncupari.

8. In redemptis per gratiam Christi nullum inveniri potest bonum meritum, quod non sit gratis indigno collatum.

9. Dona concessa homini integro & Angelo forsitan non improbandâ ratione possunt dici gratia, sed quia secundùm usum sacræ Scripturæ nomine gratiæ ea tantum munera intelliguntur, quæ per JESUM Christum

ma-

malè merentibus & indignis confe-
runtur , ideo neque merita , neque
merces , quæ illis redditur , gratia di-
ci debet.

10. Solutio pœnæ temporalis , quæ
peccato dimisso sàpè remanet , & cor-
poris resurrectio , propriè non nisi me-
ritis Christi adscribenda est .

11. Quòd piè & justè in hac vita
mortali usque in finem conversati vi-
tam consequimur æternam , id non
propriè gratiæ Dei , sed ordinationi
naturali statim initio creationis con-
stitutæ justo Dei judicio deputandum
est , neque in hac retributione boño-
rum ad Christi meritum respicitur ,
sed tantùm ad primam institutionem
generis humani , in qua lege naturali
constitutum est , ut justo Dei judicio
obedientiæ mandatorum vita æterna
reddatur .

12. Pelagii sententia est : opus bo-
num circa gratiam adoptionis factum
non est regni cœlestis meritorium .

13. Opera bona à filiis adoptionis
facta

facta non accipiunt rationem meriti ex eo, quod fiunt per spiritum adoptionis inhabitantem corda filiorum Dei, sed tantum ex eo, quod sunt conformia legi, quodque per ea præstatur obedientia legi.

14. Opera bona justorum non accipiunt in die judicii extremi amplioram mercedem, quam justo Dei judicio mereantur accipere.

15. Ratio meriti non consistit in eo, quod, qui benè operatur, habeat gratiam, & inhabitantem Spiritum Sanctum, sed in eo solum, quod obedit Divinæ legi.

16. Non est vera legis obedientia, quæ fit sine charitate.

17. Sentiunt cum Pelagio, qui dicunt esse necessarium ad rationem meriti, ut homo per gratiam adoptionis sublimetur ad statum Deificum.

18. Opera Catechumenorum, ut Fides & Pœnitentia, ante remissionem peccatorum facta, sunt vitæ æternæ meritoria, quam vitam ipsi non con-

se-

sequentur, nisi prius præcedentium delictorum impedimenta tollantur.

19. Opera iustitiæ & temperantiaæ, quæ Christus fecit, ex dignitate personæ operantis non traxerunt majorem valorem.

20. Nullum est peccatum ex natura sua veniale, sed omne peccatum meretur pœnam æternam.

21. Humanæ naturæ sublimatio & exaltatio in consortium Divinæ naturæ debita fuit integritati primæ conditionis, & proinde naturalis dicenda est, & non supernaturalis.

22. Cum Pelagio sentiunt, qui tex-
tum Apostoli ad Romanos 2. Gentes,
qua legem non habent, naturaliter, qua le-
gis sunt, faciunt: intelligunt de Genti-
bus Fidei gratiam non habentibus.

23. Absurda est eorum sententia,
qui dicunt, hominem ab initio dono
quodam supernaturali & gratuito su-
pra conditonem naturæ suæ fuisse ex-
altatum, ut Fide, Spe & Charitate
Deum supernaturaliter coleret.

24. A vanis & otiosis hominibus secundum insipientiam Philosophorum excogitata est sententia, quæ ad Pelagianismum rejicienda est, hominem ab initio sic constitutum, ut per dona naturæ superaddita fuerit largitate Conditoris sublimatus, & in Dei Filium adoptatus.

25. Omnia opera Infidelium sunt peccata, & Philosophorum virtutes sunt vitia.

26. Integritas primæ creationis non fuit indebita humanæ naturæ exaltatio, sed naturalis ejus conditio.

27. Liberum arbitrium sine gratiæ Dei adjutorio non nisi ad peccandum valet.

28. Pelagianus error est, dicere, quod liberum arbitrium valeat ad ullum peccatum vitandum.

29. Non soli fures ii sunt & latrones, qui Christum viam & ostium veritatis & vitæ negant, sed etiam quicunq; aliunde, quam per ipsum in viam

viam justitiae (hoc est , aliquam justitiam) concendi posse docent .

30. Aut temptationi ulli sine gratia ipsius adjutorio resistere hominem posse sic , ut in eam inducatur , aut ab ea non superetur .

31. Charitas perfecta & sincera , quae est ex corde puro , & conscientia bona , & fide non ficta , tam in catechumenis , quam in paenitentibus potest esse sine remissione peccatorum .

32. Charitas illa , quae est plenitudo legis , non est semper conjuncta cum remissione peccatorum .

33. Catechumenus justè , rectè & sanctè vivit , & mandata Dei observat , ac legem implet per charitatem , ante obtentam remissionem peccatorum , quae in Baptismi lavacro demum percipitur .

34. Distinctio illa duplicitis amoris , naturalis videlicet , quo Deus amatur ut Auctor naturæ : & gratuitus , quo Deus amatur ut Beatificator , vanus est ,

est , & commentitia , & ad illudendum sacris litteris , & plurimis veterum testimo niis , excogitata .

35. Omne , quod agit peccator , vel servus peccati , peccatum est .

36. Amor naturalis , qui ex viribus naturæ exoritur , ex sola philosophia per elationem præsumptionis humanae cum injuria crucis Christi defenditur à nonnullis Doctoribus .

37. Cum Pelagio sentit , qui boni aliquid naturalis , hoc est , quod ex naturæ solis viribus ortum dicit , agnoscit .

38. Omnis amor creaturæ rationalis , aut vitiosa est cupiditas , quâ Mundus diligitur , quæ à Joanne prohibetur : aut laudabilis illa charitas , quâ per Spiritum Sanctum in corde diffusâ Deus amatur .

39. Quod voluntariè fit , etiamsi necessariò fiat , liberè tamen fit .

40. In omnibus suis actibus servit peccator dominantí cupiditati .

41. Is libertatis modus , qui est à
I neces-

necessitate sub libertatis nomine non reperitur in Scripturis; sed solum nomen libertatis à peccato.

42. *Justitia*, quâ justificatur per Fidem impius, consistit formaliter in obedientia mandatorum, quæ est operum *justitia*, non autem in gratia aliqua animæ infusa, quâ adoptatur homo in filium Dei, & secundum interiorem hominem renovatur, ac *Divinæ naturæ consors* efficitur, ut sic per Spiritum Sanctum renovatus deinceps benè vivere, & Dei mandatis obedire possit.

43. In omnibus pœnitentibus ante Sacramentum Absolutionis, & in catechumenis ante Baptismum est vera *justificatio*, separata tamen à remissione peccatorum.

44. Operibus plerisque, quæ à Fidelibus fiunt, solum ut Dei mandatis pareant, cujusmodi sunt, obedire parentibus, depositum reddere, ab homicidio, à furto, à fornicatione abstinere, justificantur quidem homines,

nes , quia sunt legis obedientia , & vera legis justitia, nontamen iis obtinent incrementa virtutum.

45. Sacrificium Missæ non aliâ ratione est sacrificium , quâm generali illâ , quâ omne opus , quod fit , ut sanctâ societate Deo homo inhæreat.

46. Ad rationem & definitionem peccati non pertinet voluntarium , nec definitionis quæstio est , sed causæ & originis , utrum omne peccatum debeat esse voluntarium.

47. Unde peccatum originis verè habet rationem peccati sine ulla ratione , ac respectu ad voluntatem , à qua originem habuit.

48. Peccatum originis est habituali parvuli voluntate voluntarium , & habitualiter dominatur parvulo , eò quod non gerit contrarium voluntatis arbitrium.

49. Et ex habituali voluntate dominante fit , ut parvulus discedens sine regenerationis Sacramento , quan-

I 2 do

do usum rationis consecutus erit,
actualiter Deum odio habeat, Deum
blasphemet, & legi Dei repugne.

50. Prava desideria, quibus ra-
tio non consentit, & quæ homo invi-
tus patitur, sunt prohibita præcepto:
Non concupisces.

51. Concupiscentia, sive lex mem-
brorum, & prava ejus desideria, quæ
inviti sentiunt homines, sunt vera le-
gis inobedientia.

52. Omne scelus est ejus conditio-
nis, ut suum auctorem, & omnes po-
steros eo modo inficere possit, quo
infecit prima transgressio.

53. Quantum est ex vi transgrel-
litionis; tantum meritorum malorum
à generante contrahunt, qui cum mi-
noribus nascuntur vitiis, quam qui
cum majoribus.

54. Definitiva hæc sententia, Deum
homini nihil impossibile præcepisse,
falso tribuitur Augustino, cum Pela-
gii sit.

55. Deus non potuisset ab initio
talem creare hominem , qualis nunc
nascitur.

56. In peccato duo sunt ; actus, &
reatus , transeunte autem actu , nihil
manet, nisi reatus , sive obligatio ad
poenam.

57. Unde in Sacramento Baptismi,
aut Sacerdotis absolutione propriè
reatus peccati dumtaxat tollitur , &
ministerium Sacerdotum solum libe-
rat à reatu.

58. Peccator poenitens non vivifi-
catur ministerio Sacerdotis absolven-
tis, sed à solo Deo , qui poenitentiam
suggerens & inspirans vivificat eum,
& resuscitat ; ministerio autem Sa-
cerdotis solum reatus tollitur.

59. Quando per eleemosynas, aliá-
que poenitentiae opera Deo satisfaci-
mus pro poenis temporalibus, non di-
vinum pretium Deo pro peccatis no-
stris offerimus, sicut quidam erran-
tes autumant. (Nam alioqui esse-
mus, saltem aliqua ex parte , redem-

ptores) sed aliquid facimus, cuius intuitu Christi satisfactio nobis applicatur, & communicatur.

60. Per Passiones Sanctorum in Indulgentiis comunicatas non propriè redimuntur nostra delicta, sed per communionem charitatis nobis eorum passiones impertiuntur, ut digni simus, qui pretio sanguinis Christi à poenitentia pro peccatis debitibus liberemur.

61. Illa Doctorum distinctio, Divinæ legis mandata bifariam impleti, altero modo quantum ad præceptorum operum substantiam tantum, altero quantum ad certum quendam modum, videlicet secundum quem valeant operantem perducere ad regnum æternum, (hoc est, ad modum meritorum,) commentitia est, & explodenda.

62. Illa quoque distinctio, quâ opus dicitur bifariam bonum, vel quia ex objecto & omnibus circumstantiis rectum est & bonum (quod moraliter

ter

ter bonum appellare consueverunt,) vel quia est meritorium regni æterni, eòquòd fit à vivo Christimembro per spiritum charitatis, rejicienda est.

63. Sed & illa distinctio duplicitis justitiæ; alterius, quæ fit per spiritum charitatis inhabitantem: alterius, quæ fit ex inspiratione quidem Spiritus S. cor ad pœnitentiam excitantis, sed nondum cor inhabitantis & in eo charitatem diffundentis, quâ Divinæ legis justificatio impleatur, similiter rejicitur.

64. Item & illa distinctio duplicitis vivificationis, alterius, quâ vivifatur peccator, dum ei pœnitentia & vitæ novæ propositum & inchoatio per Dei gratiam inspiratur: alterius, quâ vivificatur, qui verè justificatur, & palmes vivus in vite Christo efficitur, pariter commentitia est, & scripturis minimè congruens.

65. Nonnisi Pelagiano errore admitti potest usus aliquis liberi arbitrii bonus, sive non malus, & gratiæ Christi

sti injuriam facit, qui ita sentit & docet.

66. Sola violentia repugnat libertati hominis naturali.

67. Homo peccat etiam damnabiliter in eo, quod necessariò facit.

68 Infidelitas purè negativa in his, in quibus Christus non est prædicatus, peccatum est.

69. Justificatio impii fit formaliter per obedientiam legis, non autem per occultam communicationem, & inspirationem gratiæ, quæ per eam justificatos faciat implere legem.

70. Homo existens in peccato mortali, sive in reatu æternæ damnationis potest habere veram charitatem, & charitas etiam perfecta potest consistere cū reatu æternæ damnationis.

71. Per contritionem etiam cum charitate perfecta, & cum voto suscipiendo Sacramentum conjunctam, non remittitur crimen extra casum necessitatis, aut martyrii, sine actuali susceptione Sacramenti.

72. Om.

72. Omnes omnino justorum afflictiones sunt ultiones peccatorum ipsorum, unde & Job, & Martyres quæ passi sunt, propter peccata sua passi sunt.

73. Nemo præter Christum est absque peccato originali, hinc B. Virgo mortua est propter peccatum ex Adam contractum, omnesque ejus afflictiones in hac vita, sicut & aliorum justorum fuerunt ultiones peccati actualis vel originalis.

74. Concupiscentia in renatis relapsis in peccatum mortale, in quibus jam dominatur, peccatum est, sicut & alii habitus pravi.

75. Motus pravi concupiscentiae sunt pro statu hominis vitiati prohibiti præcepto, *Non concupisces*; unde homo eos sentiens, & non consentiens transgreditur præceptum, *Non concupisces*; quamvis transgressio in peccatum non deputetur.

76. Quamdiu aliquid concupiscentiae carnalis in diligente est, non facit

præceptum , *Diliges Dominum Deum tuum ex toto corde tuo.*

77. Satisfactiones laboriosæ justificatorum non valent expiare de condigno pœnam temporalem restantem post culpam condonatam.

78. Immortalitas primi hominis non erat gratiæ beneficium , sed naturalis conditio.

79. Falsa est Doctorum sententia , primum hominem potuisse à Deo creari , & institui sine justitia naturali.

57. *Disc.* Audivi , Pontifices in Bulla damnationis afferere , quod nonnullæ harum propositionum damnatarum aliquo pacto sustineri possent in rigore , & proprio verborum sensu ab Assertoribus intento . Estne id verum?

Mag. Falsum omnino , ut declaravit Urbanus VIII. utque clarissime ostendit Cardinalis de Aguir in defensione Cathedræ S. Petri , disput. 20. quem legere poteris , ut etiam Ripaldam tom. 3. disp. 1. sect. 2. Velim autem , ut prædictas propositiones con-

conferas cùm erroribus Calvini, contro. 48. recensitis : clarè enim deprehendes, quod dicebam ,Bajanisum in Calvinismo fundari , consequenter etiam Jansenismum, de quo mox.

58. Quinquagesima prima controversia fuit circa annum 1640. cum Jansenistis , seu Jansenianis , qui Jansenii Ippensis Episcopi doctrinam in Bajo damnatam propugnabant , & præfertim celebres quinque propositiones , quas ex dicti Jansenii libro , cui titulus *Augustinus*, excerptas Innocentius X. damnavit. Eiusmodi propositiones sunt hæ :

1. Aliqua Dei præcepta hominibus justis volentibus , & conantibus secundùm præsentes , quas habent, vires , sunt impossibilia , deest quoque illis gratia quâ possibilia fiant.

2. Interiori gratiæ in statu naturæ lapsæ nunquam resistitur.

3. Ad merendum & demerendum in statu naturæ lapsæ non requiritur in

hominē libertas à necessitate , sed sufficit libertas à coactione.

4. Semipelagiani admittebant prævenientis gratiæ interioris necessitatem ad singulos actus etiam ad initium Fidei , & in hoc erant hæretici , quod vellent eam gratiam talem esse , cui posset humana voluntas resistere , vel obtemperare .

5. Semipelagianum est dicere , Christum pro omnibus omnino hominibus mortuum esse , aut sanguinem fudisse .

59. Ut autem Jansenii doctrinam , hásque ipsas quinque propositiones tueri post earum damnationem possent Jansenistæ , cœperunt docere , fuisse quidem illas probè damnatas ; at non esse verè excerptas ex libro Jansenii , nec in eo reperiri ; tum , si qua ex ipsis in eodem libro reperiuntur , non esse damnatam in eo sensu , quo eam docuit Jansenius , utpote non alieno à sensu Augustini , ac proinde veram ac tutam , sanctamque esse doctrinam Jansenii , nec ullam verè esse

se

se in mundo hæresim Jansenianam ,
nulos Jansenistas.

60. Sed callidis his molitionibus statim occurrit pro sua summa pietate , & zelo tuendæ Religionis Clerus Gallicanus Parisiis congregatus , ut ipse idem refert in epistola ad Innocentium X. die 28. Martii anno 1654 scripta his verbis : *Nos in hac Urbe Parisiensi congregati censuimus , & per epistolam encyclicam his litteris adjunctam declaravimus , Propositiones illas & opiniones esse Cornelii Jansenii , & in sensu ejusdem Jansenii à Sanctitate Vestra damnatas disertis & manifestis verbis .*

61. Et quainvis hanc Cleri Galliani declarationem confirmasse videatur Innocentius ad eundem rescribens , die 29. Septembris 1654. nihilo minus Alexand. VII. Innocentio paullò post subrogatus , novam edidit Constitutionem 17. Kalend. Novembris , 1656. in qua relatâ Innocentii Constitutione ita subdit : *Cum autem , sicut accepimus , nonnulli iniquitatis filii prædi-*

Etas quinque propositiones vel in libro praedito ejusdem Cornelii Jansenii non reperi, sed ficte & pro arbitrio compositas esse, vel non in sensu ab eodem intento damnatas fuisse, afferere magno cum Christi Fidelium scandalo non reformident, Nos... prainsertam Innocentii, Prædecessoris Nostri Constitutionem, declarationem, & definitionem harum serie confirmamus, approbamus, & innovamus, & quinque illas propositiones ex libro præmemorati Cornelii Jansenii, Episcopi Irenensis, cui titulus est: Augustinus, excerptas, & in sensu ab eodem Cornelio intento damnatas fuisse definitus & declaramus, &c.

62. Utque uniuscujusque fides certo aliquo, & externo documento constaret, præcepit anno 1664. omnibus Ecclesiasticis, tam regularibus, quam sacerdotalibus, etiam Monialibus, Doctoribus, & Licentiatis, aliisque Collegiorum Rectoribus atque Magistris, ut hanc formulam subscriberent. Ego N. Constitutioni Apostolicae Innocentii X. data die 31. Maii, 1653. & Constitutioni Ale-

Alexandri VII. datæ 16. Octobris 1656.
Summorum Pontificum me subjicio, &
quinq[ue] propositiones ex Cornelii Jansenii
libro, cui nomen Augustinus, excerptas,
& in sensu ab eodem Auctore intento, pro-
ut illas per dictas Constitutiones Sedis Apo-
stolicæ damnavit, sincero animo rejicio ac
damno, & itajuro. Sic me Deus adjuvet,
& haec sancta Dei Evangelia.

63. Quia verò spiritus hæretico-
rum est maximè pervicax, refracta-
rius, & cavillosus, non veriti sunt ii-
dem dicere, se subscripturos quidem
sincerè prædictam formulam, quate-
nus damnat dictas quinq[ue] propo-
sitiones, non verò, quatenus in ea dicitur,
fuisse illas excerptas ex libro Jansenii.
& in sensu ab Auctore intento damna-
tas, causantes nimirùm, hoc pertinere
ad quæstionem facti à Deo minimè re-
velati per scripturas & traditiones, ac
proinde definiri non posse ab Ecclesia
per authoritatem infallibilem, nec
eandem posse à fidelibus exigere hujus
rei fidem internam, ac juramentum,
sed

sed solum quoddam silentium obsequiosum, ne videlicet quidquam contra hujus, ut vocant, facti veritatem, aut definitionem loquantur, quod & ajunt, se juramento suo solum promittere.

64. Verum hos etiam cavillos, fraudesque sapientissime nuper disjecit Clemens XI. suâ scilicet constitutione editâ anno 1705. decimo septimo Cal. Augusti, quâ Innocentii X. & Alexandri VII. constitutiones confirmat, approbat, & innovat; ac insuper, *ut omnes Ecclesiae filii Ecclesiam ipsam audire non tacendo solum, sed & interius obsequendo, quæ vera est Orthodoxi hominis obedientia, condiscant,* decernit ac declarat, *Obedientie, quæ prædictis Apostolicis constitutionibus debetur, obsequioso illo silentio minimè satisfieri, sed damnatum in quinque propositionibus Janseniani libri sensum, quem illarum verba præferant, ab omnibus Christi Fidelibus, ut hereticum non ore solum, sed & corde rejici ac damnari debere, nec aliâ mente, animo aut credulitate*

litate supradictæ formula subscribi licet
posse.

65. Quinquagesima secunda & ultima controversia fuit circa ann. 1680, cum Quietistis, quorum Magister Michael de Molinos, Presbyter Hispanus docebat; In vita spirituali, sive mystica hos solos censendos esse perfectos & verè mysticos, qui per unum actum non revocatum Deo semel oblati, & ut dicebat, totaliter uniti, resignati, atque relicti, reliquos omnes actus ut superfluos suspenderent, ac veluti inanimati permanerent, nihil prorsus operando, neque volendo, neque petendo, nec de acceptis à Deo bonis gratias agendo, nec ad proprios defectus reflectendo, sed silendo, & merè passivè se habendo, in absoluta permanenterent indifferentia circa omnia sive pœnam sive præmium, sive infernum, sive paradisum, seu æternam damnationem aut salutem, sinendo, ut Deus operaretur, & suam Divinam voluntatem in ipsis adimpleret. Unde

&

& alios multos errores deducebant, similes erroribus Beguardorum, Beguinarum, & Illuminatorum, de quibus actum est Controv. 43. Hos vero omnes Quietistarum errores & propositiones proscriptis & damnavit Innocentius XI. decreto edito die 28, Augusti, 1687.

Atque haec sunt præcipuae cum hæreticis controversiae, continuato ferè temporum ordine propositæ; quem tamen ordinem Theologi Polemici non observant, ordinem potius rerum & materiarum secuti; quia vide licet diversi diversorum temporum hæretici circa eandem sæpè materiam, seu Fidei articulum, erraverunt. Quare Cardin. Bellarminus in hoc Theologiæ generে haud dubiè insignis, sic universæ hujus Theologiæ partes distri buendas esse judicavit, quemadmodum & abs re nostra minimè fore censi, ut hic etiam repræsentarem ad majorem tuam, tuique similium commoditatem.

§. II.